

御錄宗鏡大綱卷十八

疏八

問凡聖既同一心云何聖人成一切種智凡夫觸事不知乎答只爲凡夫背覺合塵爲塵所隔迷真徇妄被妄所遮自心與他心二俱不了焉能博通萬類成一切種智耶 故起

疏八

信論云衆生以依染心能見能現妄取境界迷平等性故以一切法常靜無有起相無明不覺妄與法違故不能得隨順世間一切境界種種知故是知心外無法法外無心但了一心諸塵自會起心背法即乖法體既與法違則不通達若能順法界性合真如心則般若無知無所不知矣問若了一心何用廣知諸法答一心是總諸法是別別雖從總事起千差若不子細通明遮照雙運則理孤事寡不入圓通維摩經云善能分別諸法相於第

一義而不動 問一色一香無非中道以何爲中道答若有中道則不名中若無中道亦不名中如涅槃經云內外合故名爲中道既云中道何得是有既云中道何得是無 若也有執則無所不礙若也無執則無所不通如智論云若人見般若若是則名被縛若不見般若是亦名被縛若人見般若若是則名解脫若不見般若是亦名解脫中道即實相是有也中道即性空是無也亦名爲假名亦有亦無也亦名爲中道非有非無也故知無執則四句皆是 問爲中即是道爲離中別有道爲道即是中爲離道別有中答離中無別道離道無別中即以道爲中即以中爲道此之中義即是一心道即是心心即是道以真心徧一切處故 肇論云有心者衆庶是也無

心者太虛是也衆庶處於妄想太虛絕於靈照豈可以處妄想絕靈照而語聖心乎故須遮照無滯體用自在方成理行之門華嚴經云菩薩住是不思議於中思議不可盡住是不可思議地思與非思俱寂滅若唯遮思議境者則凡聖絕分故非但遮常心亦應融常心是則於中思議不可盡遮融無二則思與非思體俱寂滅方曰真不思議也是則遮照無滯理事不虧即遮而照故雙非即是雙行即照而遮故雙行即是雙遣不壞本而常末萬行紛然不壞末而常本一心恒寂所以色塵體寂香界性空執你有無之邊邪達成唯心之中理法法皆圓願海塵盡具行門應念而六度咸成目擊而真心普徧如無盡意菩薩經云普賢如來國土彼諸菩薩當見佛

疏八

二

時尋能分別諸深妙義具足成就六波羅密何以故若不取色相即是具足檀波羅密若除色相即是具足尸波羅密若觀色盡即是具足羸提波羅密若見色寂滅即是具足毗梨波羅密若不行色相即是具足禪波羅密若不戲論色相即是具足般若波羅密是諸菩薩即觀佛時尋具如是六波羅密得無生忍 問真如寂滅本無次第之殊法界虛玄豈有階降之別云何一真體上而分正助答若以唯識真性則性融一切尚不指一何況分多以解行證入之門不無深淺如華嚴論云十住以來菩薩所行皆是助道非是正位故意欲明行所行者是爲助道無住無行任真自體名之爲正果故若以初發心住以法性無相根本智不雜無作用之體行諸萬行

疏八

三

菩薩與佛因果本來體齊若簡佛果無作無修菩薩正加行已來總名助道以動寂無礙正助元來不異此即全別全同境界難解佛及凡夫各自別有是全別義故二見恒存若全同故便成滯寂圓融道理事理不礙若也法門全分兩向是凡夫法全合一體是二乘法但以理事自在其道在中留心滅之此亦不可以心存之此亦不可此助道行門與正智果德無作之門體合無二事中執則不可不分以其體用不可一向全別以全同作全別以全別作全同不可全別無全同不可全同無全別如迷此同別二門即智不自在又經云智入三世悉皆平等者明智能隨俗言入三世即俗體本真故言平等以總別同異成壞門六相義該括即總而全別即別而全

總即同而俱異即異而恒同即成而俱壞即壞而俱成皆非情繫一異俱不俱有無非有無常無常生滅相故如是皆是如來理智體用依正悉自在故以自體無念力大智照之可見是以若上上根人頓了心空入真唯識性現行餘習種子俱亡則何用更立地位只爲中下之根或有緣信或有正信或有解悟或有證悟根機莫等見解不同於妄功用中分其深淺雖即明知信入唯識心境俱空以微細想念不盡未得全除分分鍊磨於昇進中故有地位差別以根塵五陰微細難亡若得識陰盡方超地位了無所得究竟圓成如淨瑠璃內含寶月如首楞嚴經云此五陰元重疊生起生因識有滅從色除理則頓悟乘悟併消事非頓除因次第盡消色陰文云佛

告阿難當知汝坐道場消落諸念其念若盡則諸離念一切精明動靜不移憶忘如一當往此處入三摩提如明目人處大幽闇精性妙淨心未發光此則名為色陰區宇若目明朗十方洞開無復幽黯名色陰盡是人則能超越劫濁觀其所由堅固妄想以為其本盡受陰文云佛告阿難彼善男子修三摩提奢摩他中色陰盡者見諸佛心如明鏡中顯現其像若有所得而未能用猶如魘人手足宛然見聞不感心觸客邪而不能動此則名為受陰區宇若魘咎歇其心離身返觀其面去住自由無復留礙名受陰盡是人則能超越見濁觀其所由虛明妄想以為其本盡想陰文云佛告阿難彼善男子修三摩提受陰盡者雖未漏盡心離其形如鳥出籠已能成就

疏八

五

從是凡身上歷菩薩六十聖位得意生身隨往無礙譬如有人熟寐寢言是人雖則無別所知其言已成音韻倫次令不寐者咸悟其語此則名為想陰區宇若動念盡浮想消除於覺明心如去塵垢一倫生死首尾圓照名想陰盡是人則能超煩惱濁觀其所由融通妄想以為其本盡行陰文云佛告阿難彼善男子修三摩提想陰盡者是人平常夢想消滅寤寐恒一覺明虛靜猶如晴空無復纍重前塵影事觀諸世間大地山河如鏡鑒明來無所黏過無蹤跡虛受照應了罔陳習唯一精真生滅根元從此披露見諸十方十二眾生畢殫其類雖未通其各命由緒見同生基猶如野馬熠熠清擾為浮根塵究竟樞穴此則名為行陰區宇若此清擾熠熠元性性入

元澄一澄元習如波瀾滅化爲澄水名行陰盡是人則能超衆生濁觀其所由幽隱妄想以爲其本盡識陰文云佛告阿難彼善男子修三摩提行陰盡者諸世間性幽清擾動同分生機條然隳裂沉細綱紐補特伽羅酬業深脈感應懸絕於涅槃天將大明悟如雞後鳴瞻顧東方已有精色六根虛靜無復馳逸內外湛明入無所入深達十方十二種類受命元由觀由執元諸類不召於十方界已獲其同精色不沉發現幽祕此則名爲識陰區宇若於羣召已獲同中消磨六門合開成就見聞通隣互用清淨十方世界及與身心如吠琉璃內外明徹名識陰盡是人則能超越命濁觀其所由罔象虛無顛倒妄想以爲其本乃至識陰若盡則汝現前諸根互用從互

用中能入菩薩金剛乾慧圓明精心於中發化如淨琉璃內含寶月如是乃超十信十住十行十迴向四加行心菩薩所行金剛十地等覺圓明入於如來妙莊嚴海圓滿菩提歸無所得佛地論中言清淨法界者則是無垢淨識真如一心即此正宗凡聖共有此一法界是四智之體四智則一體之用以諸佛現證衆生不知以不知故執爲八識之名以現證故能成四智之相若昧之則八識起執藏之號七識得染汙之名六識起徧計之情五識變根塵之境若了之賴耶成圓鏡之體持功德之門末那爲平等之原一自他之性第六起觀察之妙轉正法之輪五識興所作之功垂應化之迹斯則一心匪動識智自分不轉其體但轉其名不分其理而分其事 問

疏八

六

說有爲法皆蘊處攝如來純無漏法還具蘊
處界否答識論云處處經說轉無常蘊獲得
常蘊界處亦然寧說如來非蘊處界故言非
者是密意說又佛身中十八界等皆悉具足
而純無漏此轉依果又不思議超過尋思言
議道故微妙甚深自內證故問此智是佛知
見無師自爾何假因緣稱揚開示答此智雖
不約緣生而從緣顯若執無因皆成外道如
古師云佛法雖有無師智自然智而是常住
真理要假緣顯則亦因緣矣法華經云佛種
從緣起楞伽經云大慧白佛佛說常不思議
彼諸外道亦有常不思議何以異耶佛言彼
諸外道無有常不思議以無因故我說常不
思議有因因於內證豈得同耶是則真常亦
因緣起故知無有一法不從心生三乘之道

悉皆內證若心外立義任說幽玄皆成外道
又若入唯識智雖不執前境不同愚闇無知
無見雖照境虛智眼斯在能斷金剛般若論
頌云雖不見諸法非無了境眼所以永嘉集
云夫境非智而不了智非境而不生智生則
了境而生境了則智生而了智生而了了無
所了了境而生生無能生生能無生雖智而
非有了無所了雖境而非無無即不無有即
非有有無雙照妙悟蕭然如火得薪彌加熾
盛薪喻發智之多境火比了境之妙智其詞
曰達性空而非縛雖緣假而無著有無之境
雙照中觀之心歷落又頌曰若智了於境即
是境空智如眼了空華是了空華眼若智了
於智即是智空智如眼了眼空是了眼空眼
智雖了境空及以了智空非無了境智境空

智猶有了境智空智無境智不了如眼了空
華及以了眼空非無了空眼華空眼猶有了
華眼空眼無華眼不了 問諸佛唯一法身
云何說三身差別答約用分三其體常一識
論云如是法身有三相別一自性身謂諸如
來真淨法界受用變化平等所依離相寂然
絕諸戲論具無邊際真常功德是一切法平
等實性即此自性亦名法身大功德法所依
止故二受用身此有二種一自受用謂諸如
來修集無量福慧資糧所起無邊真實功德
及極圓淨常徧色身相續湛然盡未來際恒
自受用廣大法樂二他受用謂諸如來由平
等智示現微妙淨功德身居純淨土爲住十
地諸菩薩衆現大神通轉正法輪決衆疑網
令彼受用大乘法樂三變化身謂諸如來由

疏八

成事智變現無量隨類化身居淨穢土爲未
登地諸菩薩衆二乘異生稱彼機宜現通說
法令各獲得諸利樂事是以轉滅三心得三
身一根本心即第八識轉得法身二依本心
即第七識轉得報身三起事心即前六識轉
得化身 則八解六通一心而起三身四智
八識所成終無一理一行而從外來皆從自
識施爲一心而轉乃至一身無量身如華嚴
所明無量身雲重重無盡皆從性起無礙圓
融如日光與虛空合不分彼此 問變化身
與他受用身爲是真實心是化現心答此二
身是化然化不離真識論云此二身雖無真
實心及心所而有化現心心所法 由此經
說化無量類皆令有心又說變化有依他心
依他實心相分現故乃至自性法身唯有真

疏八

九

實常樂我淨離諸雜染衆善所依無爲功德
無色心等差別相用自受用身具無量種妙
色心等真實功德若他受用及變化身唯具
無邊似色心等利樂他用化相功德是以如
來妙體清淨法身不去不來如影如像猶四
王天之日月東持國南增長
西廣目北多聞顯清淨水中不
出不入似僑師迦之宮殿現琉璃境界非有
非無涅槃無名論云法身無像應物以形般
若無知對緣而照動若行雲止猶谷神豈有
心於彼此情繫於動靜者乎 是以諸佛不
出世亦不入涅槃但隨有心機熟衆生感見
報化之身所有見聞皆是衆生心中之影像
故云心生於有心像出於有像則諸佛無心
無身豈有勞慮疲患者乎復禮法師述三身
義云法身猶虛空之性雲蒸即翳霧斂即明

其性本常矣報身若乘空之日赫矣高昇朗
然大照其體恒在矣化身如鑿水之影泚清
即現流濁乃昏顯晦不恒往來無定夫化佛
者豈他歎報身圓應之用報身者何哉悲智
所成之體也悲以廣濟爲理智以善權爲業
所以因時降跡隨物現身身跡者用也悲智
者體也體是其本用是其末依體與用攝末
歸本欲求其異理可然乎報身即化也化身
即法也 般若云若見諸相非相即見如來
又離一切諸相即名諸佛是以舉足下足道
場觸處而無盡開眼閉眼諸佛現前而不滅
如上所說一體三身理事相成體用交徹不
出不在隱顯同時皆是一心本宗正義是以
一身多身皆是法界所悟一法即無礙法界
問諸佛法身湛然明淨如何起六根之相

答一以即相明真何乖大用二以利他勝業
不斷化門如寶性論云依自利利他成就業
義故說偈云無漏及徧至不滅法與恒清涼
不變異不退寂靜處諸佛如來身如虛空無
相妙色常湛然六根甚明淨佛眼見衆色耳
聞一切聲鼻能嗅諸香舌能練衆味身覺三
昧觸意知一切法除諸稠林行佛離虛空相
又偈云如虛空無相而現色等相法身亦如
是具足六根相又偈云如來鏡像身而不離
本體猶如一切色不離於虛空 起信論明
不思議業相則諸佛境界云何不思議以非
一非異不有不無非言思可定情解所測故
稱不思議之業相此不思議之業相者謂與
衆生作六根境界故寶性論云諸佛如來身
如虛空無相爲諸勝智者作六根境界示現

疏八

十一

微妙色出顯妙音聲令嗅佛戒香與佛妙法
味使覺三昧觸令知深妙法常化衆生是真
如之用故云不思議業也此本覺用與衆生
心本來無二但不覺隨流用即不現用則於
彼心中稱根顯現而不作意我現差別故云
隨根自然相應見無不益是隨染本覺之相
所以菩薩能行非道通達正道若入宗鏡門
究竟之道則染淨由心無非無正若入方便
門分別之道則菩薩大悲力故常行無礙古
德問云非道之行是煩惱業菩薩應斷云何
行之答有三義一漸捨門止惡行善二捨相
門善惡俱離三隨相利益門染淨俱行此第
三門更有三義一約行自行修淨化他隨染
二約人化凡同染化聖同淨三約法隨世間
法必須現染修菩薩法必須修淨又問菩薩

行非道修何道答道有三種一證道謂二空
真如正體智證二助道緣修萬行助顯真理
三不住道即是悲智不住生死不住涅槃所
以菩薩示行現同其事爲欲同惡止惡同善
進善若其疎異教化即難故須行非而度脫
之皆令悟入同體真心耳 問身土既總唯
一心法界之體如何是自他各受用身土之
行相答一體雖同不妨互徧同中有異自入
於他異中有同他徧於自古德問云自受用
身土一一無邊諸佛身土不相障礙行相如
何答如水乳一處其體無別鵝王飲之但得
其乳不得其水乍見將謂水乳是一若飲已
即知有異又如衆燈光同處一室自色不可
分若論光體元來各別自受用身雖合一處
元來各各有異皆自受用法樂則一一皆具

八識故所以得互徧非同一體無異非一非
異可辯佛身問既是真如何分身土耶答據
義立之於真如中以性成萬德爲身以真空
之理爲土約義即別體不相離又真理中具
四德常淨二德爲土我樂二德爲身故云我
此土淨而汝不見則真身含萬法爲土耳若
心外取土見相迷真成妄想之垢故稱爲穢
若見心性則名淨耳是以一法不動異見常
生迷有作塵勞悟空成佛國非移妙喜匪變
娑婆亦非神力所爲法性何曾遷變猶眩昏
之者同處各觀蠅髮毛輪所見差別如執外
境界皆是妄心如經云例如今目覩山河皆
是無始見病問心外無法道外無心云何諸
佛自稱出世得道廣說教門答只爲衆生不
了唯心妄生外境以不實故所以諸佛出世

若有一法是實則諸佛終不出世所說方便教門不爲知者說但爲未知者破執除疑似形言教若執喪疑消則無道可得無法可說思益經云佛言我坐道場時唯得顛倒所起煩惱畢竟空性以無所得故得以無所知故

殊八

十三

知 問宗鏡唯心者何分始末乎答始末是述心之義約用行布門中相雖歷然體常融即起信鈔問云據其論旨初是一心後亦一心初後何別答初之一心心當能起後之一心心當所歸雖前後體同目爲始終義異由是行布諸門歷然又云但以本是一心離名絕相任其迷悟萬法隨生生法本空但唯一體宗鏡亦爾爲廣義用前後不同然是一心之前後前後之一心耳所以理事平等何者非初無以立後初等於後非後無以成初後

等於初又理從事顯理等於事事因理成事等於理故云萬法雖殊不能自異也况宗鏡中一尚不能一豈况異乎所以起信論云一切諸法平等平等鈔釋有二一謂真性於一切法中平等如像中鏡二即諸法本空故平等如鏡中鏡 問夫言法身者心爲法家之身身是積聚義積聚合藏一切萬法故名爲心即何用更立般若及解脫二法答法身即是人人俱有靈智故名般若若得般若照則顯現法身故經云隱名如來藏顯名爲法身又若得般若則一切處無著不爲境縛即是解脫若顯法身得解脫功全由般若非唯此二法一切萬行皆由般若成立故五度如盲般若如導若布施無般若唯得一世榮後受餘殃債若持戒無般若暫生上欲界還墮泥

稗中若忍辱無般若報得端正形不證寂滅
忍若精進無般若徒興生滅功不趣真常海
若禪定無般若但行色界禪不入金剛定若
萬善無般若空成有漏因不契無爲果故知
般若是險惡徑中之導師迷闇室中之明炬

疏六

十四

生死海中之智熾煩惱病中之良醫碎邪山
之大風破魔軍之猛將照幽途之赫日警昏
識之迅雷抉愚盲之金鏡沃渴愛之甘露截
癡網之慧刀濟貧乏之寶珠若般若不明萬
行虛設祖師云不識玄旨徒勞念靜不可刹
那忘照率爾相違以此三法不縱不橫非一
非異能成涅槃祕藏 古德云即寂之照爲
般若即照之寂爲解脫寂照之體爲法身如
一明淨圓珠明即般若淨即解脫圓即法身
約用不同體不相離 淨名經云諸佛解脫

當於衆生心行中求若不觀自心非已智分
不能開發自身寶藏 問真如一心收盡無
邊義理究竟指歸何法答究竟指歸三德祕
藏住首楞嚴經云種種示作現衆色像故名
爲身所作辦已歸於解脫智慧照了諸色非

色故名非身所作辦已歸於般若實相之身
非色像身非法門身是故非身非非身所作
辦已歸於法身達此三身無一異相是名爲
歸說此三身無一異相是名爲指俱入祕藏
故言指歸當知般若亦知非知非知非不知
疏六
道種智般若徧知於俗故名爲知所作辦已
歸於解脫一切智般若徧知於真故名爲非
知所作辦已歸於般若若一切種智般若徧
知於中故名非知非不知所作辦已歸於法
身達三般若無一異相是名爲歸說三般若

十五

無一異相名爲指俱入祕藏名指歸當知解脫亦脫非脫非脫非脫方便淨解脫調伏衆生不爲所染名脫所作辦已歸於解脫圓淨解脫不見衆生及解脫相故名非脫所作辦已歸於般若性淨解脫則非脫非非脫所作辦已歸於法身若達若說如此三脫非一異相俱入祕藏故名爲指歸當知種種相種種說種種神力一一皆入祕藏中何等是指歸指歸何處誰是指歸言語道斷心行處滅永寂如空是名指歸故知能化所化無盡法門未有一法不指歸宗鏡所以普智禪師云佛道皆因何法成悟心無體蕩無明莫怕落空沉斷見萬法皆從此處生 問凡聖之道同一法身如何起應化之身攝機宜之衆答只爲衆生不了自他唯心橫生彼此若

自達真空則諸佛終不出世菩薩亦無功夫古德問云若言自他俱是自心現離心無實我人者諸佛亦見有衆生豈可有妄心未盡耶答諸佛見有衆生俱是緣生幻有不知謂實有我所以造業受報枉有輪迴此由無實我感諸佛慈悲若實有我非是妄有者諸佛何故妄救衆生以我實有不可救故今爲救者定知無我妄計有也故知衆生不離佛界迷不覺知華嚴經頌云佛身非是化亦復非非化於無化法中示有變化形 是故現化十六紛然未嘗不寂真性湛然未曾不化若不達此理自尚未度焉能化他 如說五身者獻公維摩疏釋云所謂法性生身亦言功德法身變化法身實相法身虛空法身詳而辯之一法身也何者言其生則本之法性故曰法

性生身推其因則是功德所成故言功德法身就其應則無感不形則是變化法身稱其大則彌綸虛空所謂虛空法身語其妙則無相無爲故曰實相法身故知一體不動名逐緣分矣 大乘千鉢大教王經云如是一切諸佛教化方便法智我皆集在一心中同金剛菩提聖性三摩地故金光明最勝王經云譬如日月無有分別亦如水鏡無有分別光明亦無分別三種和合得有影生如是法如如如智亦無分別以願自在故衆生有感知現應化身如日月影和合出現如來者無去無來故云往應羣機而不去恒歸寂滅而不來何者依體起用故是去以即體之用故不去應機現前合是來以應不離體如月之影故不來又往應合故是去應無應相故不去

天

七

恒歸寂滅合是來滅不可得故不來乃至一切法皆無來去 如華嚴光明覺品文殊師利頌云世及出世見一切皆超越而能善知法當成大光耀若於一切智發生迴向心見心無所生當獲大名稱衆生無所生亦復無有壞若得如是知當成無上道又大乘大集經云佛告賢護如火未生或時有人發如是言我於今日先滅是火賢護於意云何彼人是語爲誠實否賢護答言不也世尊佛告賢護如是諸法從本以來畢竟無得云何於今乃作斯說我能證知一切諸法我能了達一切諸法我能覺悟一切諸法我能度脫一切衆生於生死中此非正言所以者何彼法界中本無諸法亦無衆生云何言度但世諦中因緣度耳故知心外無法何所得耶佛身無

爲但隨緣現如肇論云放光云佛如虛空無去無來應緣而現無有方所然則聖人之在天下也寂寞虛無無執無競導而弗先感而後應譬猶幽谷之響明鏡之像對之不知其所以來隨之罔識其所以往恍焉而有惚焉而亡動而逾寂隱而彌彰出幽入冥變化無常其爲稱也因應而作顯迹爲生息迹爲滅生名有餘滅名無餘然則有無之稱本乎無名無名之道於何不名是以聖人居方而方止圓而圓在天而天處人而人原夫能天能人者豈天人之所能哉果以非天非人故能天能人耳是以明鏡無形能現萬形聖人無心能應萬心隱不韜光顯不現迹故論云聖人寂泊無兆隱顯同原存不爲有亡不爲無何者佛言吾無生不生雖生不生無形不形

雖形不形問如來法身即真心性如來報身依真而起若如來化身還有心否答若約體亦不離若約事即分如深密經云曼殊室利菩薩復白佛言世尊如來化身當言有心爲無心耶佛告曼殊室利菩薩曰善男子非是有心亦非無心何以故無自依心故有依他心故 問一切境界因心分別若有分別即屬無明故云無心分別一切法正有心分別一切法邪諸佛如來已斷無明無有心相云何能知真俗差別之境名一切種智答以法疏八無自體故即分別無分別以體不礙緣故無分別即分別如起信論云自體顯照故名爲覺者謂有難言若無別體何能普現衆生心行故答云自體顯現如珠有光自照珠體珠體喻心光喻於智心之體性即諸法性照諸

法時是自照耳故論文甚分明然論中問曰
 虛空無邊故世界無邊世界無邊故眾生無
 邊眾生無邊故心行差別亦復無邊如是境
 界不可分劑難知難解若無明斷無有心想
 云何能了名一切種智答曰一切境界本來
 一心離於想念以眾生妄見境界故心有分
 劑以妄起想念不稱法性故不能決了諸佛
 如來離於見想無所不徧心真實故即是諸
 法之性自體顯照一切妄法有大智用無量
 方便隨諸眾生所應得解皆能開示種種法
 義是故得名一切種智如鈔云以內迷真理
 識外見塵故於如量之境不能隨順種種知
 也如人動目天地傾搖故不能如實知也是
 知心海波停萬像齊鑒澄潭浪起諸境皆昏
 御錄宗鏡大綱卷十八

音釋

括 古活切 疊 音牒重也 魔 音掩中魔也 寐 音寐寐言 黏 音黏相著
 也 殫 音單 熠 音一入切 輝 音盛光也